

Balua gba Djaki Eli na kalanu

Balua gba Djaki-e, apo bhúlá ongú inde a ayo me u mene e. Aní aye pí ndu okpála gba Ebhe inde atsambala pílá doto libhomu. Djaki agama 'ngú ne bádha 'li pindji ongú inde atsia imbilangú, engú inde a ayo me u mene e bhú dasundu gba omakilisito.

Balua ango-o ngalu kpekpeke pindji bádha 'ngú inde bhú okulu di ne nabhuka , ne pindji namene 'ngú na Ebhe maka makilisito.

Ongbengbe ongú inde bhú bhuku inde-e ngae inde:

Eli na kalanu 1:1

Nabhuka, a la di-e imbilangú 1:2-8

Nadu bhú ndibhili ne nadu ne tia bhelé 1:9-11

Nali bhú nale 1:12-18

Nadje 'kpí, a la di-e okulu 1:19-27

Nagbele 'dje kpála pindji nagbogbo bhusu o
2:1-13

Nabhuka, a la di-e okulu 2:14-26

Makilisito ne 'mi e 3:1-18

Makilisito, a la di-e ongú na doto 4:1 - 5:6

Olíli ngangá 5:7-20

Djaki yi okpála gba Ebhe-e mayi

¹ Ngama, Djaki, bali gba Ebhe, bali di gba Ngámá Yesu Kilisito-o , ma yi ndu okpála gba

Ebhe hana inde atsambala p'ila doto libhomu-o mayi.

Yi du ne kpéke bua bhú okpekpeke da 'ngú

² Ondaise ma, li okpekpeke da 'ngú du abhaka yi ne li okpadji ngangá-a, yi de du bhúbhú ne djali naali. ³ Padhá de, anga yi mbila ndjindji me, i du me nabhuka gba yi-e nde alu kpekpeke bhú okpekpeke da 'ngú-o, nabhuka ang-o tsia há pi yi kpéke bua. ⁴ Kaka-a, yi lila liyi uu! Padhá de, anga a ayo me kpéke bua gba yi-e kolo bha bini ali soso, ngubula me yi bhele li bua yi, amba yi a'ó ká suka bádha 'ngú bini de.

⁵ I du la me kpála bini bhú ká yi nde aneke imbilangu-o, a ayo me ani yo ka Ebhe, amba Ebhe ha pi ani. Padhá de, anga Ebhe ngahaha pi ndu okpála hana ne bádha bua, la di ne bua na keke de. ⁶ Engú bini, a ayo me ani yo ne nabhuka. Ani adú ne bua na bhisi bhisi de. Padhá de, anga kpála inde ne bua na bhisi bhisi-e, ani maka ngbo 'ngu inde li anvi ngatumba e pí djila 'ngbé 'ngu. ⁷ Kpála ang-o a'ó 'to e de me ni asía 'he ka Ebhe Ngámá-a de, ⁸ anga ani ne bua na bhisi bhisi. Ani mbila la di de me bhú ká ondu 'ngú gba ni-e hana-a, ni améne pi-ie de.

Engú inde akólo li obhulu ndibhili ne obhulu tia

⁹ A ayo me mabhuka inde bhú ndibhili-e kpi djali. Padhá de, anga Ebhe nga'e'e ani abhúlá. ¹⁰ La di-e, mabhuka inde ne bhulu tia-a, a ayo me ani kpi djali, anga Ebhe ngakø ani ne kuto. Padhá de, anga ani akódho 'kpí maka felele na

ulu inde abhú bìli. ¹¹ Ela ngakoto ne kpéke djua gba e, i tsúlu ulu, li ulu-o 'úlu. Li ulu a'úlu lie, li felele felele tí kuto. Abhomu-o, li bádha gba ulu ango-o tsia kólo padhá. A bhadi moko pi bhulu tia. Padhá de, anga kpála ango-o akólo padhá bhú ká ondu 'he gba e hana inde aní ngamene e-o.

Ebhe ti da nato kpála bhú nale de

¹² A ko djali pi kpála inde ne kpéke bua bhú okpekepeke da 'ngú. Padhá de, anga pita aní ane okpekepeke da 'ngú lie, aní tsia sía makalá inde li Ebhe apa nani me ni ahá e pi okpála bhende akunda ni ko. Makalá ango-o, a ko mukobho na duduma. ¹³ Li nale* bhaka kpála-a, aní apá de me: «Ebhe ngato ma bhú nale-e ngae» de. Padhá de, anga mabhundja nale kpála bhú Ebhe ade. La di-e, Ebhe ngae makpe-e, ti da nale kpála bini de. ¹⁴ Kpála ngali bhú nale ka gumu na sisiti inde li bua e-o. Gumu na sisiti ango-o gbéle aní, i tsia tó aní bhú nale. ¹⁵ Pipita-a, gumu na sisiti-e bí 'bhi, i zú siti 'ngú. Siti 'ngú ango-o bhele-e, i tsia zú nakpi.

¹⁶ Ondaise ma na mukunda, yi apíte liyi de. ¹⁷ Ndu 'ngú na babadha hana, la di ne ndu tia inde ane ne bádha hana ngayie ka Ebhe, inde abho ndu 'he na zizi inde abhúlá-a† hana ngae-o. La pi aní-e, zi aní djidji lie de, aní yíe la di bhú da e 'kpí bini de. ¹⁸ Ebhe akunda nani ngae

* **1:13** 1:13 Bhú eli na giliki-e, kpéke da 'ngú ne nale-e, a ko bha koli 'he bini. † **1:17** 1:17 Ndu 'he na zizi inde abhúlá: A akunda napa me ela, epe ne oikupala.

makpe naha mukobho pi ní li kpadji na eli gba e na kukulu-o. A ko ngubula napa me ní du ogina nguwa bhú ká ondu 'he hana inde ani abho e-o.

Nadje eli gba Ebhe, di ne namene maka li eli ango-o apa lie-o

¹⁹ Ondaise ma na mukunda, yi mbila engú inde-e ndjindji: kpála ne kpála du adje 'ngú má gala! La-a, ani adu agama 'ngú má gala gala de! Ani adú di ake 'ngú lie má gala gala de!

²⁰ Padhá de, anga ke 'ngú gba kpála-a, ngagbe ngbili 'ngú kala Ebhe ade. ²¹ Kaka-a, yi yala ndu 'ngú bhende na sisiti-e hana. Yi yala di ndu kulu na sisiti-e hana. Yi sia eli inde li Ebhe ngalu e li bua yi-e ne nakø liyi ne kuto. Padhá de, anga eli ango-o ne angu ngú nakobho yi.

²² Yi mene engú inde li 'li Ebhe ngapa me yi mene e ko. Yi adú bha nadjedje madje de. I du mo-o de-e, amba yi ngapite bhomu-o liyi ngayi makpe. ²³ Padhá de, anga kpála bhende ngadje eli, ani tsia mene maka li eli ango-o ngapapa lie de-e, ani maka kpála bhende ngatsia bhúla e bhú bitolobi. Ani ú maka ani nde lie-o. ²⁴ Pita ani atsia bhúla e lie, ani há lie, ani tsia tápa. La-a, bha kolo má gala, ani mbíla matá de me bhúla ni de igini pi-ie de. ²⁵ Engú bini, kpála koko ngazi 'ndji e bhú líli inde babadha na kuo kuo inde ngagbegbe kpála bhú bali-e ndjindji. Ani la di ngadhedhe tété. Ani ngadje eli-e lie, ani 'líli 'to e tété de. Bhú namene maka li eli-e ngapapa lie, kpála bhomu-o adú ne djali.

²⁶ I du me kpála nde ngabhundja me ni ngamene engú na Ebhe, engú bini, ani mbila

nalila 'mi e de-e, kpála ango-o ngapite lie ngae makpe. Engú na Ebhe inde li kpála ango-o ngamene e, a padhá. ²⁷ Engú na Ebhe inde kukulu-o, inde la di babadha bhú djila 'Dyi ní Ebhe-e, a ngae inde: a ko nanu nateteke otsulosi di ne oøkøsi bhú likabhu gba o-o, a la di-e nalila lie, amba engú na doto inde-e asíti ni de.

2

Yi aú okpála koko ngbéngbé ane okoko de

¹ Ondaise ma, yi abhuka Ngámá gba ní Yesu Kilisito , inde abedhe ne sangu bedhe-o. Kaka-a, yi aú okpála koko ngbéngbé ane okoko de.

² Ní pa nga me: bhulu tia bini inde adyi kati na olo, di ne obabadha bongo na kuo kuo, ali li bili inde yi apøkøbhø bhúla yi lie-o. Pipita-a, li bhulu ndibhili inde adyi naae okakadha bongo lí di oo.

³ Yi tsia ú bhulu tia inde adyi obabadha bongo na kuo kuo ngbéngbé ane mane. Kaka-a, yi tsia pá pi ani me: «Ngamu-o, du si, li bádha bili inde!» Yi tsia pá la naae pi bhulu ndibhili-e me: «Ngamu-o, lu malu», ne me: «Du kuto bhú doto bhú li 'dhu ma si!» ⁴ I du me yi nde amene mo-o, amba yi ngau okpála koko ngbéngbé ane okoko mane. Yi la di ngakodho 'ngú ne mabhundja na sisiti.

⁵ Ondaise ma na mukunda, yi djedje nga: Ebhe alo okpála bhende naao ne obhulu ndibhili bhú djila okpála na doto-o. Ani akunda me u du ne nabhuka naali, ngubula me u li bhú Nau gba ni inde ni apa me ni ahá e pi okpála bhende ngakunda ni ko. ⁶ Engú bini, yi ngau obhulu

ndibhili-e bhú djila yi padhá! La-a, a ngato mbolo li yi-e da? A la di ngagbe yi bhú ngbanga da? A ko obhulɔ tia di? ⁷ A ko matá bhadi uo di inde ngasobho 'ili na babadha inde li Ebhe aha e pi yi-e?

⁸ Bhuku gba Ebhe-e apa me: «Kúnda kilí mɔ maka mo okúnda limɔ lie ngamɔ makpe ko.†» A bhomɔ-o líli inde bhú Nau gba Ebhe ko. I dɔ me yi nde ngalila líli ango-o, amba yi ngamene bhomɔ-o ndjindji. ⁹ Engú bini, i dɔ me yi nde ngau okpála koko ngbéngbé ane okoko mane-e, amba yi ngamene siti 'ngú. La di-e, líli-e agbite yi, anga yi ngagumɔ bhomɔ-o líli. ¹⁰ Padhá de, anga i dɔ me kpála bini nde agumɔ té líli-e, ani nde la ngamene dudu-o hana ndjindji-e, amba ani agumɔ bhomɔ-o líli-e libhomu. ¹¹ Padhá de, anga Ebhe inde apa me: «Mo okúnda bhoko, i dɔ di-e ɔlɔ gba kpála koko de», ani apa di ngae me: «Mo obhólɔ kpála de.» Kaka-a, i dɔ me mɔ nde kúnda bhoko, i dɔ di-e ɔlɔ gba kpála koko de-e, engú la bini, mɔ bhɔlɔ kpála-a, amba mo ogumɔ líli-e agumɔ.†

¹² Ka 'ngú bhomɔ-o, yi gama 'ngú, yi mene di 'he me yi nde ngambila ndjindji me líli akódho 'ngú gba yi-e makodho, líli ango-o, a ko bhende ngagbegbe kpála bhú bali-o. ¹³ Padhá de, anga bhú nedhinga nakodho 'ngú-o, pi kpála bhende i dje nani ndjinga okpála koko de-e, Ebhe djé di ndjinga ani de. Engú bini, kpála bhende ngadje

† **2:8** 2:8 Tsia bhú Lev. 19:18. † **2:11** 2:11 Tsia bhú Eki. 20:13, 14; di ne bhú Det. 5:17, 18.

ndjinga okpála koko-o, ekpí nakodho 'ngú gba okpála-a 'ó tsulɛ li anɪ de.

Nabhuka inde ne kulu ade-e, a kuku

¹⁴ Ondaise ma, kpála bini ti da napa me ni ne nabhuka. Engú bini, i dɛ la me anɪ nde suno kulu kulu-o de-e, nabhuka ango-o tí da nakobho anɪ uu? ¹⁵ Ní pa nga me: ndai yi bini na bhobhoko, i dɛ di-e bhe na øelø, u ne bongo ade, u di ne ezɛ ngú ekpí bini bini ade. ¹⁶ Li kpála bini bhú ká yi pa pi uo me: «Yi nɛ ne guo 'ngú ! Yi nɛ dyi bongo, amba yi zɛ 'he, yi 'u'u ma'u'u!» Oeli bhomɛ-o améne pi uo mangua bádha 'ngú dho, i dɛ me yi nde ha ehe inde u nde bhú ndibhili e pi uo de-e? ¹⁷ A si maka nabhuka. I dɛ me mɛ nde abhuka-a, engú bini, mɛ suno kulu kulu-o de-e, amba nabhuka gba mɛ-o kuku.

¹⁸ Engú bini, kpála ti da napa me: «Okpála koko aha lio pi nabhuka, okoko aha lio pi kulu.» Li kpála pa mo-o, ma gíe pi anɪ me: «Suno mɛma, lele pi mɛ ti da nadɛ lie ne nabhuka me mɛ nde mene kulu kulu-o de-e! Ngama la di-e, ma asúno nabhuka gba ma-a pi mɛ bhú namene kulu ango-o.» ¹⁹ Ngayi-e, yi ngabhuka me koli Ebhe bha bini. A ndjindji naali. Osisiti bua ngabhuka bhadi moko. La di-e, u ngagukɛ ne tsulɛ.

²⁰ Yi ne ongingi! Yi akunda me u suno pi yi me nabhuka inde li kulu kulu nde lie ade-e padhá-a? ²¹ Lele pi li ogbi ní Abalahama akolo nani lie ngbingbili bhú djila Ebhe-e? A ko nani li pápá na okulu gba anɪ-e di? Li nedhinga inde anɪ aha ndili gba e tsaka lie, anɪ atsia a'o anɪ

li bili natsulu enu pi Ebhe-e? ²² Yi ngau me nabhuka, di ne okulu gba ani-e, adu nani adholo bhú dabili bini. Ka okulu gba ani-e, Ebhe atsia au me nabhuka gba ani-e abhele. ²³ Abhomu-o, eli inde li Bhuku gba Ebhe-e apa e-e, atsia amene lie. A ko eli inde apa me: «Abalahama abhuka Ebhe. Kaka-a, Ebhe atsia au ani me, a ko ngbili kpála .†» Ebhe atsia a'i la di ani me olia ni. ²⁴ Yi ngau me Ebhe ngaziba me kpála inde-e ngbingbili li pápá na okulu gba e-o. A ko bha bini ka nabhuka kpi e kpi de.

²⁵ A bhadi si maka Lahaba, olo inde adu akunda obhosi ngangá-o. Ebhe aziba nani me a ko kpála na ngbingbili ka okulu gba ani-o. Padhá de, anga ani asia nani okpála inde li omafsalaele atima nani o agba e. Ani atsia amene la di me u gie lio li kpadji koko.

²⁶ A moko. Maka li ewo du lie bhú kute de-e, amba kute bhomu-o kukuo, a bhadi moko, li nabhuka du ne kulu bhú e de-e, amba nabhuka ango-o kukuo.

3

Ní lila 'mi ní malila

¹ Ondaise ma, bhelé na okpála bhú ká yi aglí nadu omusuno de. Padhá de, anga a ayo me yi mbila ndjindji me Ebhe akódho 'ngú gba ní omusuno-o kpekpeke naali ané okpála koko mane. ² Ndu ní hana ní ngati bhú ongú bhelé. I du me kpála nde ti bhú engú inde ani ngagama e de-e, amba kpála ango-o abhele. Ani ti da nadu

† 2:23 2:23 Tsia bhú Dje. 15:6.

ne angu pí 'ndji kute e libhomu. ³ I du me ní nde ato mboye kalase bhú 'bhø opunda ngubula me ní to bhúla uo li pápá inde ní ngakunda e, ní ti da namene di ne kute uo libhomu maka ní akunda lie. ⁴ Yi tsia nga ongbengbe zabu. A ngbengbengbe. Anvi na kpekpeke ngatutumba ngae. La-a, mboye 'he masudha inde ngalili bhúla 'ngbé zabu-o ngadjidji ngae. Li zabu-o tsia nú li pápá inde li kpála nadjedjele ngakunda e ko. ⁵ A bhadi moko pi emi. A ko mboye ehe masudha bhú kute. Engú bini, a ngabhi 'kpa e pí 'ka e li ongu na ngbengbengbe.

Yi tsia nga me ne mboye dhegu djua masudha, u ti da natsulu 'ngbé gbøndø na ngbéngbé! ⁶ Emi bhadi maka djua, a ko dabili gba siti-o. A ko saka yá ní, a la di ngasiti kute ní libhomu. Djua na likabhu na daduma pí 'mi ní. 'Mi ní la di ngatsulu makobho gba ní-e libhomu ne djua angoo. ⁷ Kpála-kuti ne angu ngu na'o mboli li ndu djua oenu na bili hana, abana oedhu, onu inde ngagbele lio ne 'bu o, abana osungu. Ani a'o la bhadi mboli li uo a'o. ⁸ Engú bini, kpála-kuti ne angu ade ngu na'o mboli li 'mi e. Emi ne ehe na sisiti. A tili naali. A abedhe la di ne sili na bhøø kpála bhú e bedhe!

⁹ Bha ne emi bini bhomu-o, ní ngadhøø Ngámá inde 'Dyi ní-o. La bhadi ne emi bini bhomu-o, ní sosobho okpála inde li Ebhe abho o maka e makpe ko. ¹⁰ Oeli na dhøø di ne oeli natu pedjø-o, a ngaze bha bhú koli ebhe bini. Ondaise ma, a ayo mo-o de. ¹¹ Koli kpongu bini ti da nagbe engu na babadha, di ne engu na sasu

de. ¹² Ondaise ma, ndula na figi ti da nali lí ndula na olive uu? Ne me 'lá ndula na vino ti da nali lí ndula na figi uu? Kpongu na 'ngu ngutu ti da nagbe engu na babadha de.

Imbilangu inde ayie abhúlá

¹³ Kpála bhende na imbilangu, inde di akø mboli 'ngú bhú ká yi uu? A ayo me ani suno bhú dasundu gba e na babadha. Ani suno di bhú kulu inde ani ngamene e ne nakø lie ne kuto di ne imbilangu. ¹⁴ Engú bini, i du me yi nde ne 'ngbé bua naali-e, di ne bua me o one okpála koko mane-e, yi 'o nabhi 'kpa yi pí 'ka yi ma'o. Yi asíti engú na kukulú-o ne eu gba yi-e de. ¹⁵ Ngua imbilangu bhomu-o yie abhúlá de, a ko bhe na doto. A ko bhe na kute, a ko bhe gba kpála inde bhú e ne siti bua . ¹⁶ Padhá de, anga bili inde li okpála nde lie ne 'ngbé bua-a, bili u nde lie ne gumu nane okpála koko mane-e, oo-o, naje lio dú-u de. A adú bha bini oo ne ondu 'ngú hana bhe na sisiti.

¹⁷ Engú bini, imbilangu inde ayie abhúlá-a, a naae kpi hana. La di-e, a ne guo 'ngú , a ne bua na bhubhuku, di ne namanga kpála. A abedhe di ne naje ndjinga okpála koko, a ngazu obabadha nguwa. A ngau okpála koko ngbéngbé ane okoko mane ade, a la di ne kali bhú e ade. ¹⁸ Okpála bhende akunda guo 'ngú-o, maka okpála alulu 'dyi. Nguwa inde u alulu e, a ko guo 'ngú, a ngazu pi uo ngbili 'ngú .

4

Mu kunda engú na doto-o, amba mu ne bhulu yala gba Ebhe

¹ Okpekebhe di ne ogbele-e ngayie bhú ká yi su? A ngayie bhú osisiti gumu na ndu 'ngú ngangá inde ngagu gbele bhú kute yi-o. ² Yi kukunda nasia ehe bini, engú bini, yi ti da nasisia de. Kaka-a, yi bedhe ngú nabhili okpála. Yi dudu ne gumu na sisiti ngú nasia ehe bini, engú bini, yi ti da nasisia de. Kaka-a, yi ngamene kpekebhe, yi la di ngagu gbele. Yi sisia ehe inde yi akukunda e de. Padhá de, anga yi yoyo ka Ebhe de. ³ Belegu yi ayoyo lie, yi sisia de anga yi yoyo maka ayo lie de. Yi yoyo bha bini ehe inde i nganga li yi-o. ⁴ Ngayi obambakuya inde-e! Yi mbila de me nakunda engú na doto-o, a ko nadu bhulu yala gba Ebhe-e di? Kpála bhende akunda engú na doto-o, ani nga'o lie bhulu yala gba Ebhe. ⁵ A aye nani lie padhá de me: «Ebhe akunda bua gba e inde ani a'o nani e bhú ní-e naali.»* ⁶ Engú bini, bádha bhú 'bu inde li Ebhe nde ne e pi ní-e, ane ne engbé. Kaka-a, u aye bhú Bhuku gba ani-e me:

«Ebhe ne bhulu yala gba okpála na 'ngbé 'ndji, engú bini, ani ne bádha bhú 'bu pi obhende ngakø lio ne kuto ko.†»

⁷ Kaka-a, yi manga Ebhe. Yi holo bhú 'dhu yi ka Djabulu kpekepeke, amba ani kpe yi tsutsu. ⁸ Yi

* 4:5 4:5 Ebhe akunda bua gba e inde ani a'o nani e bhú ní-e naali: U ti da napa matá me: «Bua inde li Ebhe a'o e bhú ní-e abedhe ne osisiti gumu 'he.» † 4:6 4:6 Tsia bhú Gbt. 3:34.

dyudyo liyi de Ebhe masikpe, amba ani dyudyo di lie de yi masikpe. Ngayi okpála na siti 'ngú, yi vɛlɛ 'kpa yi! Ngayi okpála li bua o agbolo ngangá-a, yi vɛlɛ bua yi! ⁹ Yi mbila ndjindji me yi bhú likabhu. Yi ku 'gbá, amba yi lopolo liyi. A ayo me ezo gba yi-e dji lie, a akolo egbá, amba djali gba yi-e dji lie, a akolo likabhu. ¹⁰ Yi kɛ liyi bhú djila Ngámá ne kuto, amba ani tsia 'e'e yi ne abhúlá.

Mo okódho 'ngú gba kpála koko de

¹¹ Ondaise ma, yi adú apa siti 'ngú li yi sɛnda yi de. Kpála bhende ngapa siti 'ngú li ndai e, i dɛ di-e nakodho 'ngú gba ani-e, ani ngapa siti 'ngú bhomɔ-o li líli gba Ebhe, di ne nakodho 'ngú tété. Bhú nedhinga bhomɔ-o, ani ngamene líli ade, ani mangbo ngakodho 'ngú tété. ¹² La-a, Ebhe aha líli ngae makpe. Ani tí la bhadi da nakodho 'ngú tété ngae kpi e kpi. Ngaani kpi e kpi, ani tí da nakobho kpála, di ne na'o me kpála kpi. Ngamɔ-o, mɔ la naamɔ ne da, mɔ ngakodho 'ngú gba kpála koko lie?

Yi adú ne 'ngbé 'ndji de

¹³ Yi dje nga ma mbia inde, ngayi okpála bhende ngapa me: «Naki, i dɛ di-e mambi, ya anú bhú gudhu bhe. Ya así oo kalanga bini. Ya atsíndji 'he, ya tsia sía falanga.» ¹⁴ La-a, yi mbila de me mukobho gba yi-e adú mambi pi-ie de! Padhá de, anga yi maka nguwa inde ngau lie ngubula nedhinga bedi, pipita-a, u u matá-a de ko! ¹⁵ A ayo mangbo me yi pa me: «Í dɛ me Ngámá nde akúnda-a, ya adú bhú mukobho. Ya

tsia méne engú inde, i du mo-o de-e, ya méne engú koko.» ¹⁶ Engú bini, mbia inde-e, yi ne okpála na 'ngbé 'ndji. Yi la di ngabhi 'kpa yi pí 'ka yi. Ndu ngua ongbengbe 'ndji bhomu-o hana sisiti. ¹⁷ Kaka-a, li kpála mbila namene bádha 'ngú-o, engú bini, aní mene la bádha 'ngú ango-o de-e, amba aní amene siti 'ngú.

5

Ngayi obhulu tia-a, yi ku 'gbá

¹ Ngayi obhulu tia-a, yi dje nga ma mbia inde! Yi ku 'gbá, amba yi tu di 'ue ka olikabhu inde akólo li kute yi ko! ² Tia gba yi-e azi. Okoké azu la di obongo gba yi-e azu. ³ Olo gba yi, la di ne aladja gba yi-e agba mbelende. Mbelende ango-o a'ó 'ngú pí yi ngae. Mbelende azú la di kute yi maka djua. Yi apo ibili bhúla tia gba yi-e mbia inde-e ali sokpí! ⁴ Yi ayala naha tia pí okpála na kulu inde ngamene kulu bhú 'dyi gba yi-o. Kaka-a, u ngalopolo lio. La di-e, Ngámá na abhúlá, Angbamili adje nalopolo lie gba uo-o adje. ⁵ Píla doto-o, yi adu bhú ká tia, yi atsia adu akobho ndjindji naali. Yi akolo ne tsikpa maka oenu inde akolo ne tsikpa ngubula ekpí inde u abhéle uo lie ko. ⁶ Yi a'o mangimbo pí kpála na ngbingbili-o. Yi atsia abhéle la di aní. La-a, aní lu kala yi ne gbele de.

Yi du ne 'ndjá bua, anga Ngámá ngago

⁷ Kaka-a, ondaise ma, yi du ne 'ndjá bua akólo bha bini li 'kpí inde li Ngámá agó lie ko. Yi tsia nga kpála inde ngalu 'dyi-o. Aní ngadjeke nguwa

inde ane ne bádha-a ne 'ndjá bua. Anì ngadjeke bhadi nedhinga inde lì ebha na kalanu, di ne bhende na soso-o adhí lie-o. ⁸ Ngayi di-e, yi dũ ne 'ndjá bua. Yi dũ ne masi. Padhá de, anga nago gba Ngámá-a akolo masikpe. ⁹ Ondaise ma, yi apá siti 'ngú lì yi sũnda yi de, amba u akódho 'ngú gba yi-e de. Padhá de, anga kpála nakodho 'ngú-o alu lì obhøbhoti. ¹⁰ Ondaise ma, opolofeta inde akpokpo nani 'ngú ne 'lì Ngámá-a, abi nani likabhu ne 'ndjá bua. Yi kpata engú inde u amene e-o. ¹¹ Ní ngapa me okpála bhomu-o, a ko okpála na djali. Padhá de, anga u adũ bhú likabhu ne kpéke bua. Yi adje maka lì Djobe abi nani likabhu lie ne kpéke bua-o. Yi atsia au la di ehe inde lì Ngámá aha e pì anì alì soso-o. Padhá de, anga Ngámá abedhe ne ndjinga, la di ne bua na babadha.

¹² A ane la mane ondaise ma, yi atú silika de. Yi atú silika ne 'lì kokpí de. Yi atú silika ne 'lì 'he koko belegu de bini. I dũ me a nde mo-o, yi de pa bha me: «A moko.» I dũ la di me a nde mo-o ade-e, yi de pa bha me: «A mo-o ade», ngubula me yi asía mangimbo ka Ebhe de.

Nayo gba kpála na ngbingbili-e, a ne angu naali

¹³ Bhú ká yi-e, kpála bini bhú likabhu uu? A ayo me anì yo Ebhe. Bhú ká yi-e, kpála bini ne djali uu? A ayo me anì dhøgø Ngámá bhú oetsi. ¹⁴ A lì kpála bini bhú ká yi ne kuo uu? A ayo me anì 'i obhelesi okpála na Piga gba Ebhe . U yo Ebhe ngubula anì, amba u tuko la di emu pí 'ndji anì ne 'lì Ngámá. ¹⁵ I dũ me u nde ayo bhú dabili

bini ne nabhuka-a , li nayo ango-o kóbho kpála na kuo-o, li Ngámá 'é ani bhúlá. I ðu me ani nde amene siti 'ngú-o, li Ebhe tsia 'é siti 'ngú ango-o. ¹⁶ Kaka-a, yi mbamba ta osisiti 'ngú gba yi-e sùnda yi. Yi yo Ebhe ngú yi sùnda yi, amba okuo gba yi-e yie. Nayo gba kpála na ngbingbili-e, a ne angu naali. ¹⁷ Eliya nani ne kpála-kuti maka ní. Ani ayo nani Ebhe ne bua e hana ngubula me ebha adhí-i de. Ebha tu pála doto belegu de bini, ngubula kalanga bata ne epe madhia. ¹⁸ Pipita-a, ani ayo matá Ebhe. Abhomu-o, ekpí atse 'kpa li ebha kuto, doto atsia aholo di nazu nguwa gba e-o.

Yi gie kpála inde a'o ká ngbili kpadji-e li kpadji na kukulú

¹⁹ Ondaise ma, kpála bini bhú ká yi ti da na'o ká ngbili kpadji. Pipita-a, li kpála koko tsia gie matá ani li kpadji na kukulú. ²⁰ Yi mbila ndjindji me kpála inde agie kpála bini na siti 'ngú, inde a'o ká ngbili kpadji li kpadji na kukulú-o, ani akóbho bua kpála bhomu-o bhú kuo, ani tsia méne me u mbu li bhiti osisiti 'ngú gba kpála bhomu-o.

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source files dated 29 Jan 2022

6b4904fb-f8ce-5931-8218-7cee8914232c